

'e sfogliatelle (di Ferdinando Russo)

N'ata volta 'nParaviso  
era 'o tiempo de li "rrose  
e 'nce n'erano a migliare  
'ncrispatelle e addurose,  
succedette 'nu revuoto  
dint'all'ora d'a cuntrora,  
e san Pietro, che durmeva  
se susette e ascette fora.  
Fora 'o "ffrisco 'e nu limone,  
san Francisco se sbrucava,(bruciava la gola)  
ca voleva fà capace  
a san Ciro c'alluccava.(gridava)  
- Tu che vuò? Songo d'e "ttoje ?  
Ma guardate c'ata cosa!  
Mò a 'nu santo n'è permesso  
cchiù de cogliere 'na rosa!  
San Francisco rispunneva:  
- Ciro mio, te sto preganno!  
Songo 'o santo 'e tutte 'e sciure!  
e sti ccose tutt' 'e ssanno!  
Posa 'a rosa, t'aggio ditto  
e sarrà meglio 'pe "ttè!  
- Ma sta scritto a quacche parte?  
- Accussì piace a me!  
- Ma guardate! Se fa forte  
pecchè è frate a Gesù Cristo!  
- Mò te sono 'na carocchia!(un pugno in testa)  
- Tu si 'o primmo cammurrìsto!  
Pe 'sti strille, pe st'allucche,  
Santo Pietro se scetaje.  
- Che "mmalora! St'ammuina  
a chest'ora! E quanno maje!?  
Pace, pace, amice mieje!  
Sante cu sante, nun sta bene! ...  
Site surde? E datavelle,  
"ccà nisciuno ve mantene!  
Sulamente, Ciccio mio,  
t'aggia dì chello ched'è!  
'Sta mancanza è grossa assaje  
e me meraviglio 'e te!  
Tu ca 'e fatto chella vita,  
mo 'nce vò, sempe tentato

da 'o diavolo curnuto  
ca vulea farte dannato!  
Tu c'attuorno 'pe lu munno  
sì curruto predecanno  
'a crianza, 'a fratellanza,  
'a pacienza, e raggiunanno  
mmiezzo 'a folla cchiù fferoce  
e chiù pazza, sì passato,  
sempe a nomme d'o Signore,  
perdunanno e turmentato;  
mò tu pure tiene 'e nierve!  
Pure a tte 'a nevrastenia,  
guaio niro 'e tutto 'o munno ?  
Cicciarièee! ... Madonna mia!  
E, vutanne 'e spalle, steva  
quase pe se ne turnà,  
quanne Dio da copp'a loggia  
s'appennete p'o chiammà.  
- Guardapò, dì a chisti dduje  
ca 'a cuntrora nun s'allucca!  
Mo aggia avuto 'na canesta  
m'ha mannata 'a Croce 'e Lucca!  
Songo cierte sfugliatelle,  
quann'è ogge ca 'e spartimmo,  
dì 'a 'sti guappe, 'a parta mia,  
'ca "ccà guappe 'un ne vulimme.